

Illā spiritualia, hæc naturalia fortassis non incommodè dixeris. Væ autem illis, qui hîc *Diabolica* aut quærunt, aut aliis obtrudunt. Nam diabolus, omnium spiritualium tenebrarum, stultitiæ, malitiæq; , fons, non finit eos, qui diabolicos libros de industria legunt, in cœlesti sapientia proficere. Libris enim superstitiosis & magicis, tanquam laqueis, lectores, cultoresq; suos in nequitia detinet, ne sapientiæ lux eis affulgere possit. Caveant ergo omnes sincerioris theologiæ amatores, ne *Spiritus familiaris & olympicos*, quos quidam nequam venditant, sibi, vel mediante conjuratione adsciscant, vel conjuratos ab aliis emant, quorum ductu erudiantur ex pacto sive explicito, sive implicito. Sapientiam veram docere nequeunt, quoniam eam haud possident. Lux veræ sapientiæ tanta, tamq̃ue sublimis est, ut malorum spirituum castra non subeat. *Ne impari jugo copulerimini cum infidelibus, quod enim consortium justitiæ cum iniustitiâ? & quæ communicio luci cum tenebris? Et quæ concordia Christo cum Belial?* 2. Cor. 6. 14 15. Libris diabolicis jure annumeratur libri calumniarum & scommatum plenissimi & sycophantiosè scripti, quorum hodie uberior seges est, quam muscarum in Armenia, cùm caletur maximè. Et plurimi hoc tempore sibi laudi ducunt, si in pios & doctos invehantur, eorumq̃ue scripta convitiis proscindant & petulanter carpant, etiam si ea neque perlegerint, neq; sensum eorum probè perceperint. Confer Thomam Campanellam lib. 4. de sensu rerum cap. 1.

II. *Media DIVINA sunt, quæ omni naturæ & industriæ humanæ vi superiora, ad elevandam mentem, quæ in principium theologiæ in suas partes historicè dislocatum invollet, & formandam Dei notionem ac cultionem divinitus conceduntur.*

III. *Eaq̃ sunt vel primi ordinis, ut precatio & vitæ sanctimonia, vel secundi ordinis, ut ipsa naturæ dona.*

Deus enim non tantum gratiæ, sed & naturæ auctor est, *Gen. 1. 1* & hanc per illam perficit & lapsam tollit & elevat.